



SAOPŠTENJE ZA JAVNOST

Određen pritvor za lice T.T. zbog osnovane sumnje u izvršenje krivičnog djela Teška krađa

(Brčko, 22.08.2025. godine)

Na prijedlog Tužilaštva Brčko distrikta BiH, Osnovni sud Brčko distrikta BiH odredio je pritvor licu T.T. (45)* iz Brčkog, zbog postojanja osnovane sumnje da je kao saizvršilac izvršila krivično djelo Teške krađe.

Osnovni sud Brčko distrikta BiH je odredio jednomjesečni pritvor licu T.T. (45)* iz Brčkog zbog postojanja naročitih okolnosti koje ukazuju da bi boravkom na slobodi mogla ometati krivični postupak uticajem na svjedoke, saučesnike ili prikrivače, shodno članu 132. stav 1) tačka b) Zakona o krivičnom postupku Brčko distrikta BiH.

Naime, u ranim jutarnjim satima dana 21. augusta 2025. godine osumnjičena je po prethodom dogovoru predala ključeve od stana u vlasništvu bivšeg supruga M.T., licu M.Ž. iz Brčkog u namjeri da on iz istog obijanjem metalnog sefa za njih protivpravno prisvoji imovinsku korist. Nakon što su stanari stambene zgrade u ulici Braće Ribnikara u Brčkom u noćnim satima začuli buku iz stana na IV spratu i isto prijavili Policiji Brčko distrikta BiH, te po dolasku službenika Policije Brčko distrikta BiH i Vatrogasne jedinice Brčko distrikta BiH u namjeri nasilnog otvaranja vrata stana, lice M.Ž. iz Brčkog koje se nalazilo u stanu pokušalo je pobjeći sa mjesta događaja. Usljed pokušaja bijega na način spuštanja niz vertikalni oluk zgrade lice M.Ž. je palo na betonsku podlogu i od zadobijenih povreda na mjestu preminulo. Prilikom identifikacije tijela preminulog utvrđeno je da se radi o policijskom službeniku Policije Brčko distrikta BiH M.Ž. (55)* iz Brčkog. Za cijelo vrijeme trajanja predmetnog događaja, osumnjičena T.T. (45)* je čekala u putničkom motornom vozilu koje je u vlasništvu lica M.Ž., a u kojem je od strane policijskih službenika Policije Brčko distrikta BiH nekoliko sati kasnije zatečena kako spava.

Nakon izvršene kriminalističke obrade u Policiji Brčko distrikta BiH, osumnjičena T.T. (45)* lišena je slobode i izvedena pred dežurnog tužioca Tužilaštva Brčko distrikta BiH, koji je procijenio da postoji dovoljno zakonski razloga za podnošenje prijedloga za određivanje pritvora.

U daljem toku postupka, Tužilaštvo će nastaviti poduzimati zakonom propisane istražne mjere i radnje u cilju utvrđivanja svih važnih činjenica za ovaj događaj i daljeg krivičnopravnog procesuiranja odgovornog lica.

****Ovom objavom ne prejeducira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.****

**VRŠILAC DUŽNOSTI
GLAVNOG TUŽIOCA
RADMILO IVANOVIĆ**